



Progjet promovût di 'Il Friuli' e 'ARLeF'

## LIS AVENTURIS DI VIGJI E...

### CJÂR DIARI,

o soi biel pacjific devant de stue a gjoldi dal cjaldut. Daria invezit, e je sentade sul sofà cu la sô amie Silvia. Mi domandi: ma ce àno tant di fevelâ stant che al è di plui di trê oris che a babin? Il lôr cjacarâ continui mi disturbe e no rivi a cjapâ sium. O sgnauli a fuart, sperant di fâur capî che mi dan fastidi ma al pâr che no rivin a capî la mê lenghe, stant che a alcin la vôs. Come se nol bastàs, cumò al sune il telefon di Silvia cuntune **sglinghinade** che


### SGLINGHINADE

SUN FIN, SUTÏL,  
TIPIC DI CAMPANEI  
O DI OGJETS DI  
METAL

mi sturnìs lis orelis: e je sô mari che i dîs di tornâ subit a cjase par vie che il so cjan, Junior, al è tal zardin dut in agjitazion, e al vûl scjampâ pe strade. Colpe dal temporâl: al à tante di chê pôre, che al è restât imberdeât cu lis çatis tra la rêt e il mûr dal curtîl! Mi ven di ridi... Biadin! Par fortune che jo o soi un gjat, e nô gjats nus lassin in cjase ancje cuant che al plûf. Ti saludi, il to Vigji

## Tant par ridi

Un siôr une vore agjitât al va dal miedi e i dîs "Dotôr, dotôr, al è di trê dîs che no mangji e che no duar... ce aio?" E il miedi, convint: "Al varà... fam e sium, o imagjini!"



## IL CJANTON DE MUSICHE

### NOVEMBAR

*Al rive Novembar jentrant par la puarte, al pie il fogolâr, e al cîr une cuvierte. Al distache lis fueis a boscs e campagnis, al puarte cjaminis in zeuts propit tantis.*

*Rit. Al rive Novembar cun tante braûre, cidinis lis stradis, la tiere e je scure. Lis fueis pituradis di cent mil colôrs, a colin dai arbui, sparîts ducj i flôrs.*


*Al rive Novembar che al puarte la ploie, si inglacin i fossâi, il lâ e la roie. A duarmin i prâts, i flôrs no son plui, a stan tal cjaldut il cjan e il tutui.*

Piçule cerce de cjançon "Novembar". O podês scoltâle dute te pontade di Maman! di cheste setemane su Telefriuli.

(Peraulis di Daria Miani; musiche di Flaviano Miani)


## ZÛCS

### JUDE JUNIOR A CJATÂ LA STRADE PAR PODÊ ZUIÂ CUN VIGJI



## LU SAVEVISO CHE...?

■ Ai gjats no ur plâs bagnâsi par vie che il lôr pêl si suie une vore planchin. E sintîsi bagnâts no i plâs a di nissun...



Maman! Une gnove stagjon cun tantis sorpresis! Us din apontament su

telefriuli



Vinars aes 5.45 sot sere

Pagjinis curadis di Daria Miani  
Consulence linguistiche de ARLeF

ARLeF  
AGENZIE  
REGIONÂL  
PE LENGHE  
FURLANE